

BUKI NOBO TOCANTE ORGANIZACION ESTATAL DI ARUBA



ORANJESTAD(AAN):Riba prome di januari 1986, Aruba a haya su Status Apart dentro di Reino Hulandes.

Esey a significa cu Aruba a sali for di constelacion Antillano y a bira un pais riba su mes.

Desde e fecha ey, Reino Hulandes ta consisti di tres pais: Hulanda, Antillanan Hulandes y Aruba.

E organizacion estatal di un pais no ta un topico cu ta wordo trata diariamente pero tin e interes di hopi hende si.

Y e poco literatura cu ta existi no ta disponibel pa tur hende sin mas.

Mr.Drs.Piet Pronk, rektor di Universidad di Aruba, a publica un buki nobo tocante Organizacion Estatal di Aruba, "Staatsinrichting van Aruba", un buki cu por yega den tur cas aki na Aruba.

Segun e escritor, e buki primeramente ta destina pa e studiantenan di e schoolnan secundario pa laga nan cera conoci cu algun topico elemental relaciona cu nos organizacion

estatal, manera e posicion di Aruba dentro di Reino y con Aruba ta wordo goberna.

Fuera di ta pa e grupo aki, e buki ta bon tambe pa tur otro hende cu kier sa algo mas di e posicion special di Aruba dentro di Reino.

Esaki ta e prome buki riba e topico aki cu ta duna un descripcion di e situacion Arubano.

Pesey e desarollo aki ta algo di aplaudi sin mas y por wordo considera como un progreso.

Un ventaha grandi di e buki ta cu e ta skirbi den un idioma comprensible pa tur hende y cu e ta duna hopi ehemplo pa e lesado comprende mes ora di kico ta tratando.

E buki ta bon prepara. E kaft, un variacion creativo di escudo di Aruba, a wordo diseña pa Nigel Matthew y e portretnan corespondiente a wordo tuma pa Rinus de Graaff.

E empresa VAD a produci un buki cu Aruba verdaderamente por ta orgulloso di dje, tanto pa loke ta toca e contenido como pa loke ta toca e bista di e buki.